

中



倪雲林先生詩集卷之三

荆溪 寒 曦 朝陽編集

八世孫 理 重刻

五言律詩

與張貞居雲林堂宴集分韻得春字

青苔網庭除曠然無俗塵  
依微樵逕接曲密農圃隣  
鳴禽已變夏踈花尚駐  
春坐對盈樽酒欣從心所親  
用虞道園韻奉贈謝長源

公子太傅裔好於湖上居  
卷簾微雨裏岸幘晚風餘

古刻秦斯篆玄經許椽書何當尋好事鼓柷及秋初  
題張德常良常草堂

一室良常洞幽深古大茅風瓢元自窳畦甕不知勞  
獸出逢騎虎初來學種桃還應白雲裏遲子共遊遨  
翠壁隣丹竈青楓背草堂琴書聊卒歲麋鹿自成行  
澗水流盃滑飛花入座香能無問津者及此繫舟航

贈王生蒙泉

曉鏡拂秋水晴簷度白雲青春去浩浩艷蕊落紛紛  
道在形神豫心由瞭眊分君其慎語默世事豈余聞

俞子中見過

積雨衆芳歇新晴生綠陰獸眠方不愜多子復相尋  
鳴鹿在春野啼鶯聞遠林余懷良已罄咏嘯罷清琴

賦平野

見話幽人屋荒城落日邊川途漫漫浩浩烟樹靄芊芊  
野稻初收碧江魚上釣鮮何當剩沽酒直到爾門前

對雨次張貞居韻

戶庭來游絕園林飛雨滋芳氣初襲蕙園文復散池  
裁書恐沾濕對溜謾懷思清溪已可汎方舟幸及茲



言卷二  
奉荅明卿先生

林霽去鶴唳孤烟原上村  
穰澗綠雲滿換幘晴景暄  
處和斯遺隘抱冲自寡言  
君亦固窮節衆溺何當援

題張氏藂竹軒

高軒自虛曠幽竹亦藂生  
苔石寒依玉風泉夜奏笙  
治冠輕可着醞酒綠因名  
好折青鸞尾仙壇掃月明

遊善權洞

來窺善權洞一上李公樓  
水珞巖前引雲旌松際浮  
然燈長不夜垂釣只虛舟  
欲讀吳朝刻真成冒雪遊

贈簡上人

初公經閣裏復遇簡禪師  
好飲茅君酒狂吟杜牧詩  
錢唐江上去楊柳花飛時  
帆影青山隔依依夢見之  
友人期過寺中不至

山寺擁爐夜風聲如怒濤  
獨吟何水部還思王騎曹  
曠達余所羨阻別心增勞  
來茲慰幽寂輕舟幸即操  
義興吳國良用桐烟製墨黑  
而有光膠法又得其傳將遊吳中  
以求售輒賦詩以速其行云

生住荆溪上桐花妝夕烟  
墨成羣玉秘囊售百金傳



孰謂奚珪勝徒稱潘谷仙  
老松端媿汝桐法更清妍  
贈墨生

巖谷春風起桐花落澗紅  
隔水輕烟發收煤石竈中  
豹囊秘玄玉鷺池生白虹  
湯生法潘谷千載事同風

題方厓墨蘭

蕭散重居寺春風蕙草生  
幽林蒼蘚地綠葉紫瑤莖  
早悟聞思入終由幻化成  
虛空描不盡明月照敷榮

送徐元度還江西

悠悠西江水綿綿江上山  
借問離羣鶴孤飛幾時還

白雪亦忌潔青雲安可攀  
時時王子晉吹笙向人間

秋日贈張茂實

久客東海上秋風吹練裙  
放言愛莊叟咲癖如綠雲  
采藥清晨出哦詩靜夜聞  
滄浪可濯足吾與爾為羣

悼朱高士

秋日高人逝微霜蕙草摧  
鷺羣空碧沼鶴影自層臺  
應御冷風出疑隨密霧來  
杉松暮蕭瑟撫事有餘哀

雲槎軒

已比溝中斷空思海上浮  
隨雲秋汎汎貫月夜悠悠

無路通河漢憑誰問女牛漂搖非有待吾道付滄洲  
寄王叔明

能詩何水部愛石米南宮允矣英才最居然外祖風  
釣絲烟霧外船影畫圖中他日千金積陶朱術偶同  
悼項山清上人

幽曠山中樂飄飄物外踪梵餘閑懋石定起獨哦松  
花落春衣靜雲垂澗戶重依依種蓮慶林暝只聞鐘

賦德機徵君荆南精舍圖

結廬溪水南勝事足幽探夏果足山雨春衣染夕嵐

石歌招鶴磴門俯射蛟潭日日縈歸夢蕭條雪滿簷  
追次唐綦毋潛宿龍興寺詩韻寄方厓

無家何處歸南渚有禪扉湘簾閒秋水池蓮墜羽衣  
硯池滋黯黯竹露淨微微秋燕情如客攬君去槩飛  
又贈道益

昔者劉高士匡山曾結廬插籬培杞菊克棟著圖書  
鶴影秋雲外蛩吟夜雨餘茂深繩祖武息景在林居  
又贈道益并似陸明本

作賦雲間陸能詩鄴下劉悲秋多遠思捩柁作清遊



竹冷侵衣屨窓虛見女牛燈前一盃酒漂泊更維舟  
送宗天章歸廬山

屏風茅九疊歸伴鶴巢松五老峯前路東林寺裏鐘  
宗雷憂入社陶謝莽遺踪我亦名山隱他年何處逢  
贈公遠

霜葉落欲盡晚山看更青躡將沙際屐坐久水邊亭  
俛仰已如夢漂搖同泛萍稻梁非所戀黃鵠思冥冥

寄道士王宗晉

王君舊隱地聞更結茅茨鶴鬢春裁芡鶩羣雪泛池

時歌綠水曲不負碧山期夜雨生春草令人起夢思  
寄剡九成

州府今為椽風埃多厚顏香芹渾滿澗去鶴未巢山  
思逐春雲亂心隨野水閒章君應話我樗散碧巘間  
邀張彥高

清風入庭戶野客意悠哉一與佳人別階前生綠苔  
鬱鬱松陰晚悄悄竹扉開我有盈樽酒懸榻待君來  
用韻重寄

山齋秋聽雨高卧興悠哉鹿飲荒池水蝸耕石逕苔

寶瑟芳塵滿臨尊詎忍開長吟我有待躡屩子能來  
寄張德常

卜宅近溪西雲烟只尺迷晝眠同野鶴晨類候林雞  
舊種松三逕春栽菊滿畦來禽與青李囊致不封題  
三月十日義興王子明送竹筩賦詩

竹下拾烟筩筠籃初送將亭亭似三秀楚楚異衆芳  
猶帶雨露氣更懷泉石鄉此日山中客笋蕨得新嘗

高進道水竹居

我愛高隱士移家水竹邊白雲行鏡裏翠雨落階前

獨坐敷書席相過趁釣船何當重來此為醉酒如川

張天民溪亭

卷畫溪亭月當窓影更妍朱絃彈綠水細柳舞春烟  
杜牧何年宅山僧栖夜禪張公一杯酒歎醉羲皇前  
送王州明

連榻卧聽雨劇談清更真少年英邁氣求子不多人  
仕祿豈云貴貝琛非所珍當希陋巷者樂道不知貧  
積雨

積雨生朝茵微風墮碧蓮鷺池汲書水鶴帳理琴絃



履躡苔衣破窓承樹影圓空林無與語長夏曲肱眠  
賦雪蓬

手把玉麈尾身披素綺裘梨花縈夜月柳絮入虛舟  
不作饑鳶咏其如載酒游因懷剡溪興烟水暮悠悠  
孤雲用王叔明韻

烟浦寒汀雨吳山楚水春絕無凝滯跡本是不羈人  
鶴鶴同栖息蛟龍任屈伸自嗟猶有累斯世有吾身  
二月十六日賦

白鶴烟霧遠滄洲雲海寬蘼蕪細雨濕桃李春風寒

沉憂鬱不鮮離緒杳無端還憶郊園集琴醞共清歡  
寫山陰丘壑圖寄趙士瞻

吾愛趙徵士清才能逸羣昔營山陰宅今在吳松濱  
月牖自理詠春美偏美芹遠懷松上鶴寫寄嶺頭雲  
賦雪舟

一舸星河渚空明玉氣浮懷仙李太白訪遠王子猷  
月明如可掇曙光疑欲流銀屏雲母幃夢為笙鶴遊  
題李遵道山居圖

披圖慘不樂日暮眇余思坐石看雲處空齋對榻時

世途悲荏若墨氣尚淋漓惆悵騎鯨客于今豈有之  
寫秋林遠岫圖贈約齋因題

五言韋刺史此地數曾遊無復綠陰靜空悲紅樹秋  
市聲晨浩浩雲影暮悠悠徵士冲襟勝邀余共茗甌  
次韻酬荅謝參軍王長史

岩堯太華隱婉戀東山情學本猶龍老詩工阮步兵  
心期流水遠世事浮雲輕公府饒才彥琅琅玉雪明  
示病維摩室端居無俗情清齋久絕飲白首不論兵  
露壁蛩吟切風林鶴骨輕何時王內史相見眼增明

贈友生

故人于靜遠訪我到南湖作黍蔬親淪開筵酒屢沽  
臨流同嘯咏剪燭尚歌呼長夜清無寐還為風竹圖  
題畫

甫里林居靜江湖遠浸山漁舟衝雨出巢鶴帶雲還  
漉酒松肪滑敷茵楮雪閑春風一來過似泊武陵灣  
荒村

踽踽荒村客悠悠遠道情竹梧秋雨碧荷芰晚波明  
穴鼠能人拱池鷺類鶴鳴蕭條阮遙集幾屐了餘生



詩卷三  
七月十四日對雨一首

雨簷驚瀉瀑江漲忽通渠古砌羅秋草荒畦綴晚蔬  
稍開雲表月還掩篋中書欲話幽貞意忘言已久如  
寄虞子賢

天濶海漫漫崑山望眼寬桃源迷晉世松樹受秦官  
雨蘚鹿迹遍霜梧鸞影寒封題數行字聊問竹平安

贈沈文舉

波光浮草閣苔色上春衣楊柳鶯啼邃櫻桃鳥啄稀  
榮名非所慕登覽竟忘歸泖水宜修禊重來坐釣磯

為文舉畫泖山圖因題

華亭西畔路來訪舊時踪月浸半江水蓮開九朶峯  
酒盃時可把林叟或相從興盡冷然去雲濤起壑松

已酉八月廿三日雨至廿六日乃開霽賦五言

呈德常

積雨琴絲緩泖堦蘚碧滋泥途方汨沒茅屋且棲遲  
酒向隣家貰盃從野老持便應從此去海上候安期

徐伯樞歸耘軒

歸耘向何處近在東膠山白雲宿虛牖釣艇當荒灣

彈琴送落月濯纓弄潺湲寸田勿根莠所願勤治芟  
用彞齋韻贈張韓二君

張仲情何厚韓康誼亦深賦詩論宿好聚首契初心  
阮籍唯須酒陶潛不解琴與君忘爾汝蕭散鶴鳴陰  
賦謝王彞齋

不面纔經宿題書細作行心親情戀戀事往意茫茫  
酒榼浮松蘂羊腔截玉肪歌詩報佳貺期此共徜徉

次韻酬彞齋見詒二首

秋氣入幽居堦前樹影踈筋骸渾懶惰服食轉清虛

薄晚魚潛渚新晴溜繞除茯苓期共煮悵望苦吟餘  
荆溪丘壑遠暇日得躋攀野客時相過高人意自閒  
敲門看修竹卜宅近青山勝事今寧有幽吟一解顏  
畫竹寄王彞齋

荆南山色裏翠竹密緣溪冉冉春烟薄冥冥暮雨迷  
夢長蝴蝶化行遠鷓鴣啼舊日栽桃李清陰自滿蹊  
聽雨

樓上看春雨玉笙悲遠天辛夷紅點筆芳草綠搖烟  
冉冉侵書幌冥冥濕釣船新愁嫌點滴元不到鷗邊



畫寄王雲浦

蕭散賢公子衡門似水清  
花間青鳥過砌下綠苔生  
山色排簷入江波照眼明  
開圖想幽境欲為寫閒情  
雨凡

雨凡唯生睡村醪不解愁  
泥塗深溺象身世眇浮漚  
逕草紛披濕林扉慘淡秋  
何人富春渚五月披羊裘

題丘氏壁

我愛丘君宅蕭然隱者風  
石邊蒙細篠井上植高桐  
墨沼鷺羣白雲窓藥蕘紅  
咏歌當上巳修禊樂融融

三芳圖

丹桂月光落猗蘭琴調清  
猷吟秋鶴瘦相對夜江橫  
芳烈誰先後才華孰重輕  
道心安有染無物惱閒情  
畫江天晚色贈志學

不見呂君久題詩懷不忘  
風聲渾落葉山影半斜陽  
獨鶴來遲莫孤帆出渺茫  
為圖秋色去畱寄讀書堂

桂花

桂花畱晚色簾影淡秋光  
靡靡風還落菲菲夜未央  
玉繩低缺月金鴨罷焚香  
忽起故園想冷然歸夢長

詩卷三  
廿一  
荅雲浦

尋真狎隱淪息景絕風塵屈子能安義陶公每任真  
山中宜餌木江上憶羹蓴亦欲從栖遯柴車為爾巾  
題墨竹贈李文遠

義興李文遠墨法似潘衡麋角膠偏勝桐花烟更清  
紫雲腴泛泛玄璧理康庚安得龍香劑霜枝寫月明

送僧

聞說四明道山川似若耶去依阿育塔還宿梵王家  
望井封殘雪江船聚晚沙光公強健否持底作生涯

垂虹亭

虛閣春城外澄湖暮雨邊飛雲忽入戶去鳥欲窮天  
林屋青西暎吳松碧左連登臨感時物快吸酒如川

三月四日解逅德方郎官九成掾史於荆溪之  
上相從及旬而別因九成徵余畫并賦詩為贈  
剡掾學阮掾宛然西晉風百年聊復爾三語將無同  
載酒來溪上看山入剡中孤帆逐雲影烟雨滿春空  
又題畫贈九成

吳山春雨淨江渚莫潮平解纜欣初霽開帆已到城



刻君有高趣樽酒慰閒情醉吐真立壑毫端一咲成  
暮春期潘徵君不至

風林驚宿雨澗戶落殘花芳月忽已晚幽期良恐賒  
黃鸝念求友鸚鵡呼煮茶猶候犢車至心親寧憚遐  
寄徐仲清

巖谷採靈藥蕭條栖遁情白雲簷下宿海鶴階前鳴  
燕俎登春茵晨飧脯竹萌詩憑五瀉水好過蘭陵城  
送李徵君遊荆溪因寄王司丞

何處尋狂客故人王子猷花落庭前樹風吹溪上舟

紫筍生春雨綠蕓滿芳洲心隨酒船發悵望不能休  
題畫贈張玄度

蕭條江渚上舟楫晚相過卷幔吟青嶂臨流寫白鷺  
壯心千里馬歸夢五湖波園石荒筠翳風前悅浩歌  
玄度文學好學工詞翰藹然如虹之氣真江南澤  
中千里駒也十二月十四日侍乃翁訪僕江渚相  
與話舊踟躕深動故園之感因想像喬木住石翳  
沒於荒筠草蔓之中遂寫此意并賦詩以贈焉  
為唐景玉畫立壑圖并賦

丹經留玉斧真籙佩青童  
蛻迹氛埃外怡情岩穴中  
吹笙緱嶺月理詠舞雩風  
欲畫玄洲趣揮毫清興同

稽山草堂為韓致因賦

稽山讀書處應近賀公湖  
礪月懸蘿鏡汀花落酒壺  
賣藥入城市扁舟在菰蒲  
逃名向深僻君豈伯休徒

五雲書屋

幽深隱者宅迢遞少微山  
賀公鏡湖曲李白棹歌還  
雨几研苔碧風軒江竹斑  
韓衆近何似晏景白雲間  
畫竹贈王光大

荆溪王隱士相見每從容  
借地仍栽竹巢雲獨傍松  
青苔盤石淨嘉樹綠陰重  
約我同栖遁蒿高茅幾峯  
題漁樵友卷

釣水復樵山逃名宇宙間  
一篙春水淨半畝落花閒  
鷗鳥時親狎松雲共往還  
厭聞塵世事緬邈不相關  
題畫贈王仲和

曾住南湖宅于今已十年  
焚筠還自翳喬木故依然  
雨雜鳴渠溜雲連煮朮烟  
何待重相過爛醉得佳眠  
南湖陸玄素高士幽居今  
王君仲和居之水木清



華戶庭幽邃余嘗寓其家四年翛然忘世慮也仲  
和以此幘索畫竹石畫已并詩其上以寫惓惓之  
懷玄素仲和外舅也故尤感余故人之思乙巳初  
月十七日

荅光大

空谷枉嘉藻幽吟當廩秋詩鏗清廟瑟書聳屈廬矛  
學業余多愧才華子歎優飛鸞天外羽斯世邈難儔

畫竹寄張天民

良常南洞口聞有掃塵齋竹影春當戶泉聲夜遠堦

自矜霜兔健安有魯魚乖截得青鸞尾因風寄好懷  
題元朴上人壁

蕭條江上寺迢遞白雲橫坐待高僧久時聞落葉聲  
鷓夷懷往事張翰有餘情獨掉扁舟去門前潮未生  
挽張德常

孝弟由天性清貞有祖風宦遊江郭遠歸隱曲林通  
嗜古真成癖歌詩信已工有才悲賈傳荏苒百年中  
寄章心遠

江海章高士相違已半年青山雲冉冉白鶴影翩翩

坐看神鰲抃行吟秋水邊何當拾瑤草遲子華山巔  
寄張景昭

烟渚落日後風林清嘯餘輕舟下天際高人遺素書  
笋脯炊菘米松醪薦菊菹子有林壑趣江海一胥踈  
寄東白上人

楓林散霞綺湖水淡秋烟忽憶北麻漾初春掉酒船  
羽客借鱸具高僧醉樓禪何時來甫里痛飲  
前

畫吳松山色贈潘以仁

吳松春水綠搖蕩半江雲嵐翠窓前落松聲渚際聞

潘郎狂嗜古容我醉書裙鼓柁他年去相從遠俗氛  
贈友

父子相師友周南義理門阿翁如玉潔賢嗣似春溫  
舍後自生笋堂陰亦樹萱西山近在望靜默以忘言  
贈陸隱君

甫里高人後風流有裔孫夢山仍夢畫留饌復留樽  
每看雲眠石因尋竹款門今朝嵐翠濕應是雨翻盆



倪雲林先生詩集卷之四

荆溪 寒 曦



八世孫 瑄 重刻

七言律詩

北里

舍北舍南來往少自無人覓野夫家鳩鳴桑上還催  
種人語烟中始焙茶池水雲籠芳草氣井床露淨碧  
桐花練衣挂石生幽夢睡起行吟到日斜

山園

言卷四  
春水鳧鷖野外堂山園細路橘花香  
栖栖身世書盈篋漠漠風烟酒一觴  
豈謂任真無禮法也須從俗着  
冠裳不營產業人應咲竹本桃栽已就行

林下

林深何處尋行逕披草時過野老家  
練練澄波晴偃月蜿蜿小塢曲  
藏蛇孤帆賣藥來勾曲獨木為橋似  
若耶高卧閉門成懶癖蒼苔從滿石樽窪

林下遣興

眼見藤梢已過墻手拈書卷復堆床  
閒臨水檻親魚

鳥欲出柴門畏虎狼冠製不嫌龜殼小  
衣裾新剪鶴翎長從來任拙唯踈懶  
一月秋陰不下堂

春日

閉門積雨生幽草歎息櫻桃爛熳開  
春淺不知寒食近水深唯有白鷗來  
即看垂柳侵磯石已有飛花拂酒盃  
今日新晴見山色還須拄杖踏青苔

二月十日玄文館聽雨

卧聽夜雨鳴高屋忽憶陂塘春水生  
何意遠林饑獸鶴若為幽谷滯流鶯  
成叢枸杞還堪采滿樹櫻桃空



復情二月江頭風浪急無機鷗鳥亦頻驚

對雨寄張伯雨

把酒獨臨溪上雨林深地僻少相過忽興天際真人  
想欲乞山陰道士鷺坐久研苔侵袖碧書成簷溜沒  
堦多悠然靜寄東軒下日莫徘徊聊短歌

雪後過陳子貞隱居

陶公卜宅南村裏快雪初晴思一遊樹辨微茫來獨  
鶴櫓搖歌側散輕鷗墨池繞溜春冰滿塵榻繙書夕  
照收相見惘然如有失掉頭吟咏出林丘

吳門賦謝陸繼之黃柑紫蟹之貺

闔閭城外皆春水斜日維舟方醉眠攜手故人驚夢  
裏送書飛雁落尊前黃柑開累煩相贈紫蟹傾筐也  
可憐憶爾獸居湖上宅晴窓竒石翠生烟

送甘允從

來尋墨沼雲林下共愛女蘿懸石床喚人鸚鵡語猶  
澁當戶枇杷子半黃奉橘定應題百顆籠鷺即欲寫  
千行蘭亭書法人間少好去山陰覓野航

送徐元度

荷鋪空林春雨餘  
艤舟江岸燕飛初  
去尋天上仙人  
珮肯顧山中隱者  
居霜月四更提劍  
舞田園二頃帶  
經鋤蘭榮柳密  
南檐下佇子雲間  
枉尺書

寄鄭徵士

谷口子真今最賢  
久別鬱鬱夢相牽  
好營秫田多釀  
酒欲買茅屋尚無  
錢兄病每書賒藥  
券客來唯候煮  
茶烟闔閭城東有  
艇子憶爾青燈相  
對眠

荆溪即事

銅官之山溪水南  
周處廟前多夕嵐  
看卷雲帆歌白

紆勸嘗春酒破黃  
柑長林獸往誰能  
覓幽事相關性  
所耽苦欲避喧那  
畏虎倘從地主結  
松龕

奉懷張外史

陰壑慘慘綠苔生  
碧雲亭亭多遠情  
松杉鶴去轉蕭  
瑟洲渚花落自蹤  
橫從君下榻住十  
日看我鼓枻出  
層城洞口茵巢無  
恙否定應閉閣著  
書成

次韻薩天錫寄張外史

谷口路微山木合  
濕衣空翠不曾晴  
饑猿扳檻為人  
立寒犬號林如豹  
聲小閣秋清聽雨  
卧長空日出採



芝行道心得失已無夢沐髮朝真候五更

送張外史還山

道士朝乘白鶴還樓臺金碧鎖空山  
天花雨飛幢節萬壑松風雜珮環  
丹井夜寒光剌剌石壇春靜蘚斑斑  
飄然便擬從君隱分我玄洲一半間

次韻陳子貞見示

漠漠寒烟墟落際猶餘凍雪鎖荒榛  
行隨雲谷采樵者飯供松龕學道人  
未必杜陵渾懶慢可憐逸少轉清真  
酒船好纜溪頭石花鳥相娛行及春

寄郊九成

芙蓉洲渚映江波落日維舟發棹歌  
坐久不知初月墮居謀何處白雲多  
糝糠富貴知吾否簿領風埃奈子何  
几格香材倘持寄熏爐茶鼎樂漁蓑

顧仲贄來聞徐生病差

室裏維摩病已瘳竹爐藥鼎雨聲秋  
一畦杞菊為供具滿壁江山入卧遊  
舟外鷗波情浩蕩窓間蝶夢思綢繆  
虎頭癡絕從談詭煮茗聊為半日留

雨後

雨後循除泉亂流落花時節綠陰稠石尊貯酒供杯  
飲素壁圖書入卧遊翳日長林歲伏虎際天春水若  
輕鷗幽居四月饒櫻筍醉裏題詩一散愁

以龍尾硯寄錢徵士

龍尾誰磋古硯池康庚玄壁隱風漪知君筆力能扛  
鼎愛我雲腴欲產芝投贈寧論百金直咏懷更賦五  
言詩唯應洗濯寒泉潔靜試松煤獨下帷

鶴溪為張天民賦

溪西松影高千尺白鶴時時眠上頭風雨不驚鷗鷺

宿雲霄應與鳳鸞遊明窓筆格珊瑚樹新釀松花瑪  
瑙甌露下鳴臯聲聞遠幽人空谷獨相求

聽秋軒

聽秋軒裏聽秋雨定起山僧坐翠微隱隱烟濤搖夜  
席濛濛花雨着人衣驟如崖瀑衝雲落婉似湘靈鼓  
瑟希六用根塵今已淨松篁陰下共香霏

次韻重居寺壁間柯博舊題

初月五日春意動遠水蕩漾情如何鏡中羞見白髮  
短柳上愁看青眼多起拂綠琴歌楚調為留明月挂



詩卷四  
六  
松蘿弭棹溪南一盃酒它年浪迹倘重過

初書記以詩來別且諄諄開諭深見方外之情  
因走筆次韻奉謝併期面別

從知四大皆假合順境逆途非樂憂夢中妄想驚得  
鹿海上忘機思狎鷗舉世何人到彼岸獸君知我似  
虛舟詩來說法能開諭頑礦無情也點頭

鄭明德新居

僦居吳市仍栽竹挂榻高齋獸待余風引香烟金鵲  
尾雨添書水玉蟾蜍仲舉未應治一室更生何用博

羣書繞床阿堵那嫌俗每罄金錢一飯餘

悼頂山清上人

盃渡前溪見水源偶來佩芷服蘭蓀香臺猶帶山窓  
影經卷長依松樹根雲起晴峯還有觸雪消春野不  
畱痕脩然戒已忘言說翠竹黃花自滿園

晨起一首寄丹丘

竹窓晨起聞幽鳥深巷絕無車馬喧多病馬卿非不  
遇歸田陶令自忘言墻陰薯蕷苗方茁雨裏櫻桃花  
正繁二月陰寒少晴日坐看春水上柴門

寄張貞居

不但入城踪迹少南隣野老見猶稀  
狂歌鳴鳳聊自慰舊學屠龍良已非  
蒼蘚渾封麋鹿逕白雲新補薜蘿衣  
羊君筆札誰能寄欲讀靈文一扣扉

送貞居還山

日暮書傳青鳥使華林瑤草待君歸  
挾舟婉婉雙龍出背雨寥廓一鶴飛  
秋水琢成蒼玉珮朝霞補作紫烟衣  
山中長史來相覓應借窓間白羽揮

再用韻寄貞居及柳太常鄭有道

華陽外史從幽討谷口高人亦賦歸  
遙憶愚溪對山坐何時茵閣看鴻飛  
荒荒旭日晞玄髮滴滴源泉浣素衣  
寂寞松窓懸榻處塵生塵尾不堪揮

次韻郊九成見寄

郭外青山舊結廬微茫野迳望中無  
殘生竟挹烟霞癖好事猶傳海岳圖  
夜壁松風懸雅樂秋池菊水酌商觚  
倘從世外求玄賞好趁輕舟看浴鳧

題米南宮石刻遺像

米公遺像刻堅珉猶在荒烟野水濱  
絕歎莓苔迷慘



淡細看風骨尚嶙峋山中仙塚芝應長海內清詩語  
家新地僻無人打碑賣每懷英爽一傷神

賦居延王孫德新小隱軒

志隱寧須分小大不論塵市與山林橘中之樂固不  
淺壺裏有春巖更深奕戲自能忘世事酒尊聊用散  
冲襟莘耕岩築苟無過豈有朝堂論道心

送浙憲掾劉彥文并簡張貞居

落日采蘋溪水綠目追帆影先飛鴻寄書為覓仙人  
隱種杏今居丹井東遠道悠悠宵入夢晴波洶洶畫

多風鳴珂使者清無事爾得漫游羣掾中

寄吳孟思并懷貞居

江海風流吳孟思十年不見鬢成絲舊同野老松花  
供今寄仙君石室碑秋日滿船初晒藥晴雲浮水獨  
臨池南山樹裏孤棲鶴爾去何當一問之

寄王審明

幾夢山陰王右軍筆精墨妙竄能文每將竹影撫秋  
月更愛山居寫白雲秘笈封題饒古迹雅懷蕭散逸  
人羣今年七夕聞多事曝畫繡書到夕曛

戲題嚴錄事所集書畫藪

兩館晝逢嚴錄事手持書畫索題詩金題玉躐齊梁  
迹墓刻厓鐫秦漢碑把玩始驚繁卷軸品量還愧拙  
言詞古人冷淡今誰尚謾葺殘編慰所思

薩仲明為丞相府掾時僦居京師名其軒曰半  
野後買宅迤陵亦揭是名於軒因雨宿其下遂  
為賦此

何意開軒名半野身存魏闕思江湖斜侵瓜圃通花  
藥稍傍薇垣近竹梧千里秋風催斫鱸九霄晨露浥

飛鳧如今別買荒城宅自掃風林候野夫

次韻和德原率性所賦十二月四日雪

海宇希微隱一毫行舟冰膠夕停篙愁看寂寂雙峰  
並細數林林亂石高豈有風塵勞白羽謾思文采照  
宮袍雪融二月溪流合洞口誰尋千樹桃

贈葛子熙

打碑直入長安道養母還歸白馬峯聞道陰厓留積  
雪將尋隱地看長松晴窓美翰山僧對寒澗行樵野  
鹿逢為問山中危太朴到州應與子相逢



題荆南精舍圖

誰畫荆南精舍圖  
烟霏嵐翠墨模糊  
林間野鹿時相逐  
洞口山猿不受呼  
尚有流泉悲夜雨  
已迷幽徑入寒蕪  
痴人莫彈西飛鶴  
雲外仙君恐姓蘇

賦德機荆南精舍圖

溪上田園定有無  
愁將歸思畫成圖  
春林寂寂花開落  
風牖泠泠鬼嘯呼  
尚有流泉悲夜雨  
已荒幽徑入寒蕪  
何當一舉同黃鵠  
未覺山川路鬱紆

贈別益以道書記

一咲相逢豈有期  
因懷西崦話移時  
李公祠畔空餘月  
陸子泉頭舊有詩  
旅思悽悽非中酒  
人情落落似殘碁  
雲濤眼底三生夢  
鷗影秋汀又語離

辛亥六月三日寓實性源禪房為寫竹梢因賦  
開門便肯留人宿  
不夜長然禮佛燈  
君已風流如惠遠  
我聊吟嘯答孫登  
來依長夏安居者  
莫厭無家有髮僧  
清夜哦詩江月白  
琅玕節下影鬢鬢

此身已悟幻泡影  
淨性元如日月燈  
衣裏繫珠非不  
得波間有筏要人登  
狂馳尚覓安心法  
玄解寧為縛

律僧曲几蒲團無病惱松蘿垂戶綠鬢鬢  
殘生已薄崦嵫景猶護餘光似曉燈縣圃雨雲元不  
隔華嚴樓閣也須登夢歸金菌山前路飯仰白雲窓  
裏僧獨鶴步庭閒顧影西風吹髮雪鬢鬢

送寶南琛往往荆溪碧雲寺兼柬方厓

碧雲林壑杳重重此去風流似簡公春藥碓間湍激  
下空山蛩響月明中結茅擬候芝三秀眠鹿應遺地  
一弓聞道重居開竹牖待予艇子過溪東

八月三日與劉道益連床夜話風雨淒然五日

開霽道益賦詩見貽次韻一首

扁舟小泊菰蒲雨玄論都消身意塵空寂室中無侍  
者蕭條雲外不羈人酒盃畏病不復舉燈火新涼差  
可親嫋嫋秋風振庭樹綠波芳草似初春

俊仲明以詩見示次韻

南湖流水綠泱泱野鶴同栖秋夜長短世應須幾緡  
屐懷人可但九迴腸驚風零亂芭蕉影冷雨淒迷齒  
苗香高尚劉君此拙遁疑之百世有餘光

別彥貞



空齋風雨話連宵歸夢不知山水遙鶴遠城荒嗟寂  
寂香霏鬢影共蕭蕭市中乳虎人三語燈下寒菹酒  
一瓢無念百年聊樂尔海鷗飛去定難招

留別王叔明

秋蛩唧唧雨蕭蕭楮穎陶泓伴沈寥此去不能期後  
會清言聊以永今朝濕雲窓裏初溫酒白鳥汀前又  
晚潮故國何人賦招隱桂花零落更停橈

別張玄度

歸去荆溪丘壑多松陵浦口復來過清風明月許玄

度泛宅浮家張志和夜雨燈檠歌陸續秋林樹子落  
杪樵相逢相別嗟遲莫人事多乖奈若何

挽鶴溪張先生

子述孫承久熾昌荐饑多施活人方向金壇下良常  
洞白鶴溪邊世壽堂孔壁遺書覘古學祇園法藏溢  
神光乘雲咲謝人間世九秩逍遙返帝鄉

送張以中由宜興歸金壇

亂後歸來事事非子長遊歷壯心違陶公館裏懷仙  
友杜牧堤邊戀落暉松下白雲初起石草間夕露已

沾衣君今尚有歸耕地顧我將從何處歸

西野對雨清坐有懷明本產準并呈道益

怪雨顛風裂芰荷鷗飛歷亂水驚波便須掃地焚香  
坐豈有高人載酒過笠澤至今能養鴨山陰何處覓  
籠鷺重陰忽霽猶斜日惆悵思君奈若何

過蘭陵留宿蔣達善家

蔣翊初開竹下筵野夫聊乘溪上舟玳簟敷床夏水  
薄緜簾受風春浪浮圍棊終日對急雨解帶六月如  
高秋可憐相便傾倒就宿為君少淹留

甘允從來過溪上將還汝寧賦此奉送

野夫住近青山郭左右雲林無市聲忽有故人騎馬  
至即呼稚子出門迎虛窓圍史少開笈細雨滄浪同  
濯纓乍別林居無所賴裁詩相憶字敬傾

送盛道士遊浙東

浙東山水隔層雲雪霽千峰曉不分蕭瑟松林疑鶴  
語縱橫苔石見羊羣昔聞陽洞啓神秘中有仙人留  
玉文羨爾尋真不辭遠好隨烟霧把飛裙

送倪中愷入都



酌酒送君遊上京風帆回首闔閭城烟消南國梅花  
發冰泮長河春水生太史奏雲龍五色伶倫吹律鳳  
雙鳴仰觀禮樂夔龍盛好播聲詩頌治平

春日送別余一秀才

翼翼高帆開遠天綠波芳草隨烟綿春林風雨集憂  
思茅屋琴書移晝眠文采由來庾信少草聖近誇張  
旭顛百年聚散如落葉行客居人俱可憐

賦王真人胎仙樓

紫閣岩堯秘玉文攝衣迎日禮神君河汾鳳吹來未

泯城郭鶴歸今復聞貪看飛裙舞綵綵遙怜風馭散  
繽紛世人政若塵眯目指點虛無疑白雲

奉和虞學士寄張外史

華陽上館誰曾到知有高人避世深當戶春雲團紫  
蓋洗空花雨散青林丹臺篆迹龍蛇動經閣松聲鸞  
鶴吟念子離居消息遠幾將書札寄遙岑

奉和苦雨

冥冥秋雨溺田禾日日奔雷吼怒鼉十里荒涼黃犢  
草五湖浩蕩白鷗波直應天地移龍穴未覺階除失

蟻窠君子憂民重興感吁嗟天意欲如何

奉和虞學士賦上清劉真人畫像

君向積金峰頂住長年高卧聽松風蓬萊雲近瞻天  
闕劍珮春明下漢宮歸去長謠紫芝曲翩然遠挹黃  
眉翁標名合在諸天上何事置身岩壑中

再和前韻

焚香坐石孤峰月飛珮朝天萬壑風邈尔空歌傳碧  
落飄然流響振金宮神君教服玄霜劑聖主能延綠  
髮翁共道乘鸞去無迹祥雲繚繞畫圖中

寄曹德昭

苦憶建溪人姓曹五湖春水雲山高丹厓青林紫步  
障蜀錦越羅金錯刀已知雅頌播廟瑟無復謳吟悲  
楚騷伏生衰朽見鵬化願同斥鷃巢蓬蒿

再寄

荆溪山水最清遠結屋溪邊住幾年澗底松栢何處  
鶴山中茶焙隔林烟清談况有王戎勝閉戶仍聞孫  
敬賢詩卷何當時寄我長篇短句使人傳

春日試筆



喜看新酒似鷺黃已有春風拂草堂二月江南初破  
柳扁舟晚下歌鳴榔苔生不碍山人屐花發應連野  
老墻美酒已拚千日醉莫將時事攪愁腸

送簡禪師易道

蓮花峰下簡禪師半醉狂吟索賦詩榻上諸僧禪定  
後水邊高閣莫鐘時不堪雨柳縈春夢且看書燈照  
夜棋苦羨雲栖松上鶴吾生漂泊竟何之

題曹伯高為曹尚書之子卜居詩卷

清貧我早識尚書身沒韓公為結廬可但家聲今不

替也趨禁直未全踈窓臨墨沼楊雄宅郭暎雲林謝  
眺居共愛諸郎遊息地風雩閑咏莫春初

雲泉小隱為張德機賦

朝夕輕鷗傍釣磯好山自不與人違琴尊花圃春酣  
後童冠風雩晚咏歸清卧半間僧入定流侵三逕客  
來稀却憐服食清虛甚黃馱松花煮療饑

送盧錄判之建寧

清溪九曲遊人少想見官河一水分理楫初辭季子  
邑到州好訪考亭文簿書閒暇對春雨齋舍蕭條栖

白雲洗我明年塵土足扁舟亦覓武夷君

寄張天民

清溪演漾綠生蘋溪上軒楹發興新只欠竹陰垂北  
牖儘多山色近南津湖魚入饌長留客沙鳥緣堦不  
畏人媿我萍踪此淹泊片雲回首一傷神

贈張景昭

張卿自道古遺民世外尋真狎隱淪虛閣松聲答笙  
磬小山桂樹絕風塵晨朝絳闕存三景夜掃青壇禮  
七真末俗頑仙非所取清才如子不多人

寄陸靜遠

積雨雲林生薜蘿墨池新漲浴羣鷺每懷笠澤從漁  
釣更擬滄浪聽棹歌蓮葉滿湖雲掩舟橘花垂戶雪  
婆娑布帆十幅秋風裏即買吳船載酒過

題趙榮祿墨竹

綠江修竹巧臨模慘淡松烟忽若無亂葉寫空分向  
背寒流篆石共縈紆春渚雲迷思鼓瑟青厓月落聽  
啼鳥誰憐文采風流意謾賞丹青沒骨圖

李文遠製墨次吳寅夫韻



潘衡墨法老坡傳承晏昆仍又幾年猷依山室燒桐  
子贈與仙人寓內篇石竈霞光存活火夜帷雲影炫  
晴烟要知文字遺不朽猶向詩中咏墨仙

張貞居有詩東梁鴻山楊君次韻

鴻山一向受朝暎戶牖嵐光晝吐吞梁婦終甘隱吳  
市戴琴遂不迥王門弦歌寂寂虛千載井曰依依自  
一村掃雪猷尋楊處士蕭條古道與誰論

用王叔明韻題畫

王郎筆力追前輩海岳新圖入卧遊歌鶴眠松猶警

露孤猿挂樹忽驚秋陶潛宅畔五株柳范蠡湖中一  
葉舟同煮茯苓期歲莫殘生此外更何求

居竹軒

翠竹如雲江水春結茅依竹住江濱階前迸笋從侵  
逢雨後垂陰欲覆隣映葉黃鸝還个語傍人白鶴亦  
能馴遙知靜者忘聲色滿屋清風未覺貧

送芳祖二上人參禮育王寺光公

四明之山林麓幽育王塔前神光派湯休賦詩歎寂  
寞遠公結社憶風派貝葉經文白業進曇花樓閣青

春幽易履上堂禮足已香烟雲霧共悠悠

宴吳氏樓居

雲松之樓高入雲松頂風聲十里聞瓊盃綺食行春  
雨翠幔朱簾捲夕曛宴遊適當山擁榻醉卧莫遣人  
書裙西飛白鶴東歸去回首巢居謝俗氛

岳王墓

奸任忠誅轉繆悠鄂王功業浩難收出師未久班師  
急相國翻為敵國謀廢壘河山猶帶憤悲風蘭蕙揔  
驚秋異代行人一洒淚荒墳落日重回頭

九日

自嘆不能孤九日一壺濁酒對西山遙憐玉樹秋風  
莫靜看冥鴻落日間草木蕭蕭雲更碧山川漠漠鳥  
飛還長途誰是陶彭澤被褐行吟意自閒

送張鍊師遊七閩

高士不羈如野鶴忽思閩海重經過舟前春水它鄉  
遠雪後晴山何處多鰲鯨卧雲芳草細鈎輶啼樹野  
烟和武陵九曲竄清絕落日采蘋聞棹歌

首夏即興呈貞居



言卷四  
鷺鴨如雲散碧波來禽青李壓枝低深林汲澗常聞  
虎清晝焚香歎下帷路出城東無十里燕來堂上不  
多時可伶稚筍都成竹忽見春蠶已吐絲

杭人有傳余死者貞居聞之愴然因賦此以寄  
果園橘熟誰分餉茅屋詩成嬾寄將衰謝皆傳余已  
死迂踈真與世相忘夜分風雨雞鳴急天濶江湖雁  
影長寥落百年能幾面論文猶及重啣觴

霧隱空山秋已深茅齋酒熟向誰斟菊花楓葉愁相  
並澗水松風伴獸吟洗耳不堪聞俗語醉眠且復罷

清琴遙知對月深予憶忍不題詩慰子心

奉次張伯雨潘子素酌唱韻

團團桂樹覆巖阿茅屋歸來雪一窩高卧丘園竒氣  
在倦遊江海故人多楚山白鴈遵寒渚練水長魚出  
素波去去南州書問少寂寥誰和紫芝歌

再和

至元三年丁丑歲十一月廿日子素徵君與允從  
郎官共載過元度許泊舟新塘之上寄示去年子  
素徵君與僕酬倡詩去年二君留林下實長至日

也而明日亦適長至忽然隔歲感之興懷貞居在  
餘杭北郭結樓居之號茅嶺行窩余久欲往觀而  
未能也且貞居復有來此之約因走筆重次韻一  
首

已向雲林開別墅兼聞茅嶺有行窩提魚就煮興不  
淺看竹頻來意更多梅隴雪晴紅綴萼墨池水暖綠  
生波懸知潘令閒居賦不比陰山勅勒歌

送盛高霞

霜髮飄飄鶴上仙相逢遼海幾何年種桃遂有劉郎

賦鼓瑟寧知曾點賢華表不歸塵汨汨吹簫何處月  
娟娟嗟余百歲強過半欲借玄窓靜學禪

寄高霞

不見情親踰一載素書到手淚滂沱仙人脫骨煩重  
瘞去鶴思歸忍再過墓左碑隨烟燼冷手栽松斷斧  
斤多知君欲話悲辛意慟哭爭如後會何

宿清流堂

衍慶院中無市聲清流堂上晚風清一派濁涇從污  
染百灘白月見空明我性非澄本爾淨外塵徒擾元



不驚恒公宴坐清涼海還許遊人來濯纓

贈君震

遠夢尋山復好仙鶴歸城郭幾何年靈芝每掇巖前  
秀祕訣還從肘後懸松月半空垂羽蓋風湍一壑瀉  
鷗絃擬開精舍當懸溜唯與丹陽許升玄

贈張楨

憶昨州民饋餽初兵戈阻絕飽艱虞忽驚歸路千荆  
棘莫致南溪雙鯉魚別浦秋蓮明泛泛寒廳夜雨落  
踈踈青衫從事將軍幙已覺門多長者車

題畫貽王光大

荆南山色隱晴湖暖翠當窓不用圖避世移家今十  
載盛書連舸泊三吳可憐畫卷撩歸夢依舊香奩傍  
藥爐珍重故人王架閣筆能扛鼎要人扶

荆南山色青如染卜築正當溪水南浪舞漁舟鷗泛  
泛雪消沙渚柳珠珍涼軒楓葉晴雲綴秋浦荷花落  
日酣舊宅不歸幽夢遠吳松聊結小禪龕

寄白石

僦屋渝盟也任渠爭巢野鵲厭鳩居人情轉劇空懷

詩卷四  
土家具無多莫借車  
踽踽獨行良不易  
紛紛薄俗竟何如  
波瀾翻覆從千變  
道眼遐觀熱惱除

寄張德常

身世蕭蕭一羽輕  
白螺盃裏酌滄瀛  
逍遙自足忘鵬鷄  
漫浪何須記姓名  
石鼎煮雲聽澗雨  
玉笙吹月和松聲  
憑君為問張公子  
曾到良常夢亦清

送德常同知

聞道之官嘉定去  
載書連舸泊江濱  
城樓近瞰吳松月  
堠館微霑滄海雲  
文子風流常宰邑  
張翰識達更

能文亦欲東觀釣  
鯨手棹歌秋趁白鷗羣

次韻奉答德常別駕初夏見懷一首

隔浦鷺鳴似打衙  
雲濤城郭夕陽斜  
汀前露冷魚鱗屋  
窻裏烟輕蟬蛩紗  
沛澤風雷時遠几  
談空衣袂不沾花  
欲分香飯能來否  
菩薩如今只在家

題張以中野亭

人境曠無車馬雜  
軒楹只在第三橋  
開門草色侵書幌  
隔水松聲和玉簫  
一榻雲山供夏簟  
滿江烟雨看春潮  
君能擷取飛霞珮  
天際真人近可招



贈惟寅

陳君惟寅天倪先生令子也天倪為黃清權高士  
之甥清介孤峭甚似其舅讀書鼓琴不慕榮進澹  
泊無欲以終其身惟寅能守其家法者也世故險  
巖安貧自樂窮經學古教授鄉里色養得親之懽  
心友愛盡弟妹之和樂綴葺詩文于以自娛余嘗  
愛其藻麗不羣蕭然有出塵之想聊摘鄙語用歎  
才華莫春之辰忽過江渚復示新製相與諷詠因  
成長句以歸美焉

不見陳君動隔年莫春孤坐此江邊政憂江濶多風  
雨却喜君來共簡編諷詠新詩非偶爾艱虞遠別更  
凄然看花相約重過已放柳條維酒船

題孫氏雪林小隱

天地飄飄一短蓬小窓虛白地爐紅倏然忽起梨雲  
夢不定仍因柳絮風鶴影離蕙簷上下鹿迹散湯屋  
西東杜門我自無干請閑寫芭蕉入畫中

陽春堂

陽春堂下春波綠臘雪初消蕙草青未覺避喧離世

俗也知習靜愛郊垆欲為野逕孤琴約盡醉華筵  
玉瓶見說陶朱有遠趣長松傾蓋碧亭亭

送杭州謝揔管

南省迢遙阻北京張公開府任豪英守臣視爵等侯  
伯僕射親民如父兄錢廟有碑刊夜雨岳墳無樹着  
秋聲好將飲食濡饑渴何待三年報政成

上巳日感懷

石梁破屋路欹斜似華陽道士家漠漠春雲飛別  
鶴潺潺夜雨雜鳴蛙閑看稚子翻書葉時有隣翁汲

東林隱所次韻

一本作東林隱  
野舟陸徵士

井花日莫傷心江水綠共舟人已躡飛霞

蕭從善集其師張外史詩為賦一首

葛翁臺上繙經處陸子泉頭試茗時石記只留金菌  
閣宮銘猶樹玉津池晚探風雅還心醉謾說曹劉是  
我師麟角鳳毛勤採拾却愁雷電取無遺

贈張玄度時方喪內

吳松江水似荆溪九點烟嵐落日西寂寂郊園寒食  
過蕭蕭風雨竹雞啼蕙花委砌心應折芳草歸途意  
轉迷曾得魯連消息否春潮隨雨到長堤



三月廿二日雨懷荆溪勝遊寄原道

我昔繫舟尋杜牧荆溪流水落川光春茶已放仙人  
掌露蘚渾侵玉女床酒闌更踏花間月舞罷猶彈陌  
上桑此日狂遊忘旦暮十年回首意茫茫

二月晦日聽劉伯容彈琴

遠思翩翩屬五湖一盃濁酒咏唐虞清琴忽作金石  
弄佳士今猶山澤臞飛絮游絲颺風日瀑流松吹洒  
巾襦羣龍汨溺淫哇久古樂蕭條古道迂

次韻送梁生讀書沈庄

上蔡梁君譜系蕃凌烟勛業舊諸孫廬山傍斗可攬  
秀大江自岷初發源夜誦庭柯雜琴響春羨汀藻帶  
潮痕休文舊宅宜終隱歸近南湖祇樹園

酬友生

泖水山光照屋廬每思潘令賦閑居客愁不解連三  
月詩贈全勝枉尺書醉墨不妨拈秃筆狂吟時復近  
前除亂離自嘆摧頽甚晝寢毋嗔老宰予

次韻思復送元白上人往中竺

求法高僧何處去向中天竺最高峰飛鳶欲沒天低

詩卷四  
樹杖錫應投湖外鐘半席白雲臨碧澗四更落月掛  
長松定回依約三千歲若見拈花紹遠宗

寄錢伯行

斑斑苔砌蕙花消忽忽美人山水遙夢得池塘春草  
句望殘烟日晚江潮汀雲沙鳥時同宿野飯芹羹或  
見招洒掃南湖石上月為留清影醉吹簫

次韻張榮祿追和楊別駕賦王番陽東湖勝遊

四首用呈雲浦耕雲二月公

祇今誰是番陽守別駕題詩凡幾春僚屬得才青瑣

舊兒童騎竹白頭新當筵意欲凌雲外今日人誰問  
水濱陳迹寥寥風景切桃源何處覓遺民

賓客從來逸興多雨深春渚綠增波笙簫載月迴鸞  
鶴雲錦飛裙織芰荷短世悠悠大槐國餘哀嫋嫋竹  
枝歌湖山窳落行人老翠影蒼烟寒蕩磨

散亂鳧鷖發棹謳波明雲淨宛如秋酒盃青落垂楊  
影塵尾風生杜若洲匣裏鳴琴俄復掩盃中覆水竟  
難收白頭聞說開元盛雙淚滂沱似瀑流

湖上晚風明綺霞春雲覆竹影交加歌喉圓滑吟山



鳥舞袖低迴亂渚花綠淨碧虛寧敢唾星垂河注欲  
乘槎王堂坐想當時勝榮祿詩成謬自誇

桑柘

桑柘蕭條半草萊百年人事哽悲摧沙丘漂母寧復  
有故國王孫誰見哀歌吹淒涼銅雀妓世途荏苒霸  
城灾遙知敕勒穹廬野日夕牛羊欲下來

謝伯理東還訪之不遇次韻因賦

謝眺宅前山黛濃山雲飛墮墨池中携家又作它鄉  
夢歸棹還隨落葉風鶴入暝烟愁浩渺鷗浮遠水思

清空尋君不遇成惆悵江草青青岸蓼紅

喜謝仲野見過

堦下櫻桃已着花窓前野客獸思家故人携手踏江  
路拄杖敲門驚夢華藉草悲歌聲激烈停杯寫竹字  
歌斜新蒲細柳依依綠西北浮雲望眼遮

丙午十一月十九日避泖上丁未十二月十六  
日始去此至陳溪分湖間矣

泖渚淹留再燠寒移居何處卜林巒可憐產不能恒  
業聊復心隨所遇安船底流澌微澌澌葦間初日已

團團故人存沒應難訪愁裏題詩強自寬

寄錢伯行

春雨斑斑長菊苗坐吟依砌蕙花消此時行逕泉浸  
濕閉戶哦詩江動搖政爾清虛忘世傲不妨貧賤使  
人驕下惟寂寞錢徵士艇子看花許我邀

寄王成夫

茂深閉閣獸焚香那識窮愁客異鄉坐拂朱絃彈綠  
水狂携紅袖泱清觴春池雨後泉應滿庭樹雲移影  
更長月燭露帷非子樂五湖烟景屬漁郎

寄陸明本索酒

楊柳低昂蕙草青西庄風景似華亭日修長史登真  
訣夜誦虛皇內景經玉牒初標紫臺籍石苔應長新  
宮銘自慙服食清虛甚為覓松肪釀百瓶

乙未歲余年適五十幼志於學皓首無成因誦  
昔人知非之言慨然永歎謾賦長句

陰風二月柳依依隱映湖南白板扉旅泊無成還自  
笑吾生如寄欲何歸美人竟與春鴻遠短髮忽如霜  
藻稀五十知非良有以重嗟學與寸心違



詩卷四  
贈王文靜

靜寄軒中酒一尊陶然醉裏別乾坤碧桃花已當窓  
發翠竹陰須映戶繁荏苒春光逐風雨婆婆歲晚樂  
丘園詵詵更祝螽斯羽若欲宜男贖種萱

在同里懷元用

一水東西雲窈窕幾家楊柳木芙蓉齋居幽閒無人  
到屐齒經行破蘚封密竹窓虛秋半雨楓林寺遠日  
沉鐘寄詩為道長相憶想亦依依念去踪

次韻荅元用

野水浮鷗不世情烟濤漂泊羽毛輕雲移短棹無幾  
久雪點青山照眼明甫里宅邊逢酒熟吳松江上看  
潮生夫君為話征途苦惆悵令人意不平

次朱秉中韻

鳥啼花落水西潯幾日門前春水深丈室自寬千戶  
邑一經已富滿籬金樗散餘年猶嗜酒夢回遠道歎  
驚心桃源亦有秦人在落日漁舟何處尋

贈張玄度

一年不見張玄度秋夜吳城忽爾逢清似石湖梅上

月瘦於廬旱瀑邊松白冠緇布前朝服短髮長齋舊  
日容昔者交朋淪落盡埋憂為樂且遊從

題本中峯觀蓮像

東南唱道據禪林諷咏蓮心契本心善矣不塵仍不  
染美哉如玉復如金三周妙法耆闍崛十丈開花玉  
井岑今日仰師猶古佛風波回首一長吟

寄熙本明

在山無事入城中每問歸樵得信通松室夜燈禪影  
瘦石潭秋水道心空幽扉獸掩林間雨疎磬遙傳谷

口風幾度行吟欲相覓亂流深澗隔西東  
白首遙知得道餘不聞詩思近何如高齋夜雪同誰  
話古木寒山獨自居夢裏只尋行去路愁時聊讀寄  
來書夕陽溪上多飛鳥若箇能看影是虛

用王子明韻

從俗浮沉多厚顏醉筵舞袖作弓彎維羅孰是逃三  
窟豹管能窺見一斑縱酒已拚時共棄歌詩猶與世  
相關承微岩穴聊終隱林下閑雲自往還

寄盧士行



闔閭浦口路依微  
笠澤汀邊白板扉  
照夜風燈人獨宿  
打窓江雨鶴相依  
畏途豈有新知樂  
老境空思故里歸  
擬問桃花泛春水  
船頭浪暖鱖魚肥

送徐子素

山館留君才一月  
梅花無數倚霜晴  
垂簾幽閣團雲影  
貯火茶爐作雨聲  
深竹每容馴鹿卧  
青山時與道人行  
歸舟載得梁溪雪  
惆悵隣雞月四更

題畫送僧

不到荆溪三十秋  
南津溪水亦東流  
用公住近金鷲

嶺魏族猶隣  
白虎丘風葉爛  
斑霜落後竹枝蕭  
瑟瑟渚邊頭  
歸逢古德方厓叟  
爲話談玄舊日遊

用大機吳人也  
住宜興保安寺  
壬子九月十九日  
將還山戲寫秋樹筠石并詩以贈之  
且以呈方厓禪伯云

綠波軒

綠波佳思復如何  
堦下清陰芳草多  
爛醉哦詩絃寶瑟  
閒眠欹枕幔烟蘿  
莫將華髮臨明鏡  
還寫黃庭換白鷺  
剪取吳松雲錦麗  
天孫機杼隔明河

又題

旅况汭洄似夢中孤舟江上白蘋風蕭條病起三家  
墅憔悴天涯一秃翁藿底鷓鴣歎鵬鴞雷鳴瓦缶棄  
黃鍾憂來直欲窮牛渚河漢迢迢碧漢通

次韻寓齋秋懷

渚蒲岸柳望秋零桂樹懸香月影清楚水浮舟歸未  
得酒盃到手句還成雲松眠鶴夢方遠露草寒蛩鳴  
不平南郭先生玄默久猶將諷咏寄閒情

問我歸期未有程秋光羈思共淒清雪留鴻迹應如

幻瓊仰龜毛豈有成破屋逃亡寒燐起故宮基構綠  
蕪平試聽嗚咽長溝水水本無情似有情

思歸江漢濯塵纓况乃秋高氣廓清滿壁山圖初睡  
起一簾烟雨又詩成遠樹阡阡烟鶴唳飛鳶帖帖暮  
潮平弄風九疊淙松瀑擬畢餘生棲遁情

追和虞道園送張伯雨入茅山詩韻

外史棲真何處尋桐花源上草苔深星壇醮後雲封  
徑仙驥歸來風滿林丹竈石幢遺住迹寒松流水續  
幽吟虞書傳寶人間世為有清詩寄碧岑



東林隱所次韻

寢扉桃李晝陰陰耕鑿居人有遠心一夜池塘春草  
綠孤村風雨落花深不嗔遊老羣爭席時有遊魚出  
聽琴白髮多情陸徵士松間石上續幽吟

寄張府判

德常明公舊有良常草堂在金壇華陽之天良常  
亦華陽洞名揭晏碩張仲舉諸學士嘗賦詩紀勝  
其後德常宦遊無定居政績彰彰顯著今為松江  
府判官因士友潘以仁之便輒賦七言一首奉寄

陰陽冥隲宜少留意間居尚可為之況身有職任  
而值饑者易為食之時乎仙官分置洞宮亦如世  
間局任者矣吾德常兄固知之也詩中因寓斯意  
云鉄崖翁見之必大咲也令英似來侍併為致意  
樗散張侯意久踈齋厨服食轉清虛童初府署標名  
後碧落仙官校籙餘海上空濛歸化鶴人間繁劇臭  
如駕吳松江水浮青玉聊此冷霞駐羽車

夜宿張判府環綠軒贈玄度

戊申十月十八夜環綠軒中借榻眠舞影霜筠風細

細縈窓素練月娟娟此生寄迹雁遵渚何處窮源漁  
刺船染筆題詩更秉燭語深香冷思凄然

呈良常安遇賢伯仲

無家已老復何歸碧樹團團尚夕暉清越風湍帝子  
瑟縱橫隴畝僧伽衣世波汨溺毋溷我節序炎涼且  
息機白鳥汀前坐來久泉侵野逕暮依微  
松陵竟失五車書梅里燒焚舊屋廬衰季悲吟歎羅  
隱盛時作賦羨相如伊優骯髒復何似臃腫支離聊  
與居日立秋風白蘋老門前江水接空虛

三月一日自松陵過華亭

竹西鶯語太丁寧斜日山光澹翠屏春與繁花俱欲  
謝如中酒不能醒鷗明野水孤帆影鶻沒長天遠  
樹青舟楫何堪更留滯更窮幽賞過華亭

再用前韻呈錢思復

霞飡雲卧養黃寧玉笈幽文護石屏一榻松濤金石  
弄半鐺茶雪夢魂醒瓏玲泰室生虛白縹緲空歌自  
始青不見仙風雲上過羽車芝蓋曉亭亭

再用韻呈諸公



北窓高卧自清寧  
烟霧衣裳雲錦屏  
舉世無知心自得  
衆人皆醉我何醒  
黃熊號野兵埃黑  
白骨生苔鬼燐青  
舊宅荒蕪時入夢  
墨池誰訪子雲亭

贈劉伯庸

前朝丞相劉忠肅  
尚有雲仍能鼓琴  
聽者三沐以三釁  
善哉如玉復如金  
久淫鄭衛亂吾耳  
忽復古初之雅音  
我思古人禁忿欲  
用此養正而鈎深

贈別姚子章都事

不見高人十五年  
相看兩鬢各皤然  
酒温鶯語煩三

請榼孰蠶筐已四  
眠舞袖醉傲明月  
下歸心飛度白鷗  
前練溪尚見韓徵  
士好示新圖竹色  
娟

四月廿八日蓬屋題

江湖風雨夢頻驚  
舟楫沿洄莫計程  
不幸乃今成大幸  
有生真亦似無生  
郝生自足賢賓主  
岑氏誰言好弟兄  
世故愛憎從毀譽  
一杯聊復暢幽情

子章號夢庵走筆題

夢庵春夢幾時醒  
隱約江湖且寓形  
愁見亂離心忽忽  
迹踈親友淚熒熒  
松陵遇我才經宿  
浙水歸舟且

暫停蕉鹿紛紛何得失霞明烟外數峯青

贈友生

江頭二月雨垂垂起濯塵纓水滿池賀監宅前重載  
酒辟疆園裏更題詩川塗幽邈鴻歸遠窓戶虛寒燕  
到遲忽見故人王架閣夜闌秉燭話余思

次韻荅王彛齋見贈

客居北渚靜視臨霜藻蕭蕭雪滿簪玉石在山聊混  
璞金蘭惟子久同心每懷往事悲今事莫棄分陰惜  
寸陰自咲蝸廬無長物窓前陶器與單衾

寄朱府判

明月娟娟夜二更挑燈孤坐不勝情尊前舊恨多年  
積枕上新愁何處生已作閑雲孤鶴去不堪隨柳傍  
花行使君為省春田出可念憂時老釣畊

和朱秉中二首

僦居茅屋碧江潯花落空階一尺深山簡由來狂愛  
酒管寧不復顧鉏金長鯨馭浪成何事老鶴鳴臯見  
遠心中歲畏從親友別自憐華髮已侵尋

白板扉開江水潯雨餘階下綠苔深愚人自寶應非



石同舍緣知不盜金天地瘡痍誰復憫江湖羈旅我  
同心故山日日生歸夢翠竹青松自百尋

題王敬之屋壁

我來陸庄如故鄉故鄉風景日淒涼解憂幸有盈樽  
酒慰眼新栽百畝秧蒲葉清波閒濯足荷花斜日起  
鳴榔當年李白成何事白髮緣愁萬丈長

贈周校書

中年習靜松江渚回首塵埃多厚顏富貴不如長處  
賤奔馳何似得心閑參天竹樹存貞碧動地波瀾壬

往還輸與荆溪周處士避人探道掩松關

過桐里

依微桐里接松陵綠玉青瑤繚復縈為咏江城秋草  
色獸行烟渚暮鐘聲黃香宅裏留三宿甫里門前過  
幾程借書市藥時來往不向居人道姓名

寄陳余二校書

吳松江水碧泂泂忽憶陳余兩隱君酒艇時搖夜濤  
月書幃影亂晴窓雲一貧老我長為客二陸英賢已  
著文何事兩君唯寂寞清言况不使予聞

贈別榮子仁

退食從容下玉除當年史館燦成書  
藝場馳騁荅賓戲筆陣縱橫賦子虛  
松水娛情經亂後圖書連舸度江初  
君來愧我無供給一勺寒泉薦菊菹

次韻邵生

已從鷗鳥狎雲深老我無機似漢陰  
采采菊花猶滿地蕭蕭霜髮不勝簪  
南遊阻絕傷多壘北望艱危折寸心  
好在吳松江水上青猿啼處有楓林

贈姚掾史

相府共推三語掾卜居曾占九龍峰  
美髯不獨如靈運佳句仍兼似鮑溶  
我有茅齋當絕壁時看晴雪落長松  
因君喚起故園夢彷彿三生石上逢

別章鍊師

方舟共濟春江濶訪我寒烟菰葦中  
鼓柁斜衝蘋葉雨鉤簾半怯杏花風  
仙人壇上芝應碧玉女窓中桃未紅  
擬趁輕帆數來往縹壺不惜酒如空

寄養正

得君佳句清如玉秋色驚人換物華  
老境侵尋真有



感故園隔絕更興嗟  
女蘿綠遍牽茅屋  
烏柏紅明映落霞  
欲酌一尊澆磊塊  
幾時邀子過田家

贈岳松澗

曾訪神仙五粒松  
澗泉流潤白雲封  
林間蘿葛交青影  
石上菖蒲開紫茸  
煮石有方留秘訣  
采花何處覓行踪  
岳君別我三千歲  
晚戲滄洲又汝逢

次韻屋漏

寂寞江天暮色懸  
重陰愁絕卷塵編  
走看破壁雨沉竈  
思卧蘆花雪滿船  
風捲高堤高樹拔  
泉翻野援藥

苗延青山天矯浮雲外  
自愛新秋爽氣鮮

送張貞居遊靈常洞兼簡王晉齋

荆溪山水閱靈宮  
子晉笙鸞駐碧峰  
午夜月明風滿帳  
千厓人靜鶴眠松  
緣知瑤草春來長  
應有仙人洞口逢  
莫為青螺翁久住  
歸時騎取葛陂龍

陸文玉見過

荆溪二月春風惡  
燈火論交夜對床  
白鶴遶壇初露下  
碧梧滿地忽霜黃  
卜商失子人誰弔  
阮籍窮途只自傷  
政使陸郎能慰藉  
賦詩懷舊更淒涼

送諸從事之越中

郡廳草色映青衫從事風流雪滿簪  
寂寥長官能化俗也知僚佐願停驂  
右軍宅裏尋苔石賀監湖邊咏夕嵐  
它日從君覓佳果來禽青李不須函

送僧遊天台次張外史韻

四明山水名天下師去那知客路遙  
雪霽驚麕騰宿莽月明寒鵲集疎條  
坐尋雲頂千峰石歸趁江頭八月潮  
說與住山光老子送賓也合過溪橋

過許生茅屋看竹

舟過山西已夕曛許生茅屋遠人羣  
鑿池數尺通野水開牖一規留白雲  
煮藥烟輕衝竈出碓茶聲遠隔溪聞  
可憐也有王猷興堦下新移廿此君

送葉道士東歸分得懸字韻

憶爾心如旌旆懸相逢泖渚欲華顛  
窮冬風景吾衰矣落日烟濤思渺然  
八咏樓前思舊宅三高祠下覓歸船  
棲幽定洗塵喧耳剗吸東陽一斛泉

送柳道傳東歸

賦詩南澗寫烏絲靄靄停雲去後思  
鄉國動成經歲



別江湖復與故人辭  
溪船斫膾雲生柁  
松室聞猿月滿枝  
他日重尋言子宅  
咏歌唯許暮春時

寄開元長老兼呈鄭明德

已公令我詩興生  
堂下綠苔無俗情  
天女下試寶花墜  
曲生相逢青眼橫  
布金已住長老宅  
乞食應憐王舍城  
何當棹歌一來過  
同載唯許鄭康成

贈道士李嘯虛

龍虎岩前李鍊師  
幾時飛鳥洞庭陰  
晴天白鶴興開遠  
秋水蒼龍光陸離  
山中杏熟從收穀  
堦下芝生看

奕棋邂逅樓船海上便  
還應與爾道相期

失鶴

啄粟巢松泰華峰  
直將天地作樊籠  
不聞丁令歸華表  
應馭王喬入太空  
行迹縱橫苔石上  
寒棲依舊竹林中  
清齋我亦厭腥腐  
長嘆思乘萬里風

送章鍊師入京

五鶴翩翩朝帝京  
青童遙侍玉皇君  
倚天樓觀金銀氣  
蔽日旌旗錦繡文  
夜禮洞庭薦明水  
春陪遊輦望祥雲  
何人得似愚溪子  
高舉凌風思不羣

言卷四  
四十三  
贈楊大同

石魚峯下子危子出有楊羲陪勝遊斜日碧山梁苑  
暮清風白拂冶亭秋松肪和飲三危露桂棹同乘萬  
里流擬酌春醪相慰藉梅花欲發聽鳴騶

江上遇楊德朋

吳淞江上米家船邂逅龜蒙舊宅前政似燕鴻交泛  
泛聊憑楮穎度年年糟床滴雨誰沽酒破衲蒙頭獨  
坐禪莫學山僧空載月主人情重更留連

寄德朋

故人欲問梁鴻宅遺迹猶應杵舊存楓葉菊花秋瑟  
瑟荒園廢圃雨昏昏農人掩舍春明墅縣吏催租夜  
打門唯有德朋多遠思賦詩刻燭酒重溫

寄友

幽窓談笑話平生三十年前幾變更白髮滿頭今已  
老青山排闥故多情桃花灼灼應無語春雨蕭蕭尚  
未晴明日扁舟携好酒南山笋蕨正堪烹

馬國瑞東臯軒

未羨勳名馬伏波少游鄉里樂婆娑輕舟陌上山堪



數細雨籬邊菊未莎浩蕩五湖鷗夢遠蕭索萬里鶚  
情多寒廳時有幽人宿月燭高懷慢綠蘿

次韻通書記同過鄭先生舊宅

女蘿垂綠翳衡門野水通池沒舊痕有道忘情觀物  
化清言如在相人存淒涼江海空茅宇慘淡烟埃委  
石尊一奠山泉薦芹藻古心寂寞竟誰論

清明

江雲籠雨白烟生愁眼看花淚濕纓可惜紅英滿芳  
草又經上巳復清明漂漂羈旅燕鴻迹昵昵愁思見

溪山勝槩樓

一本有與伯  
雨登四字

女情老鶴莫教塵土浣碧岩松下煮芝朮

溪山勝槩樓

樓下清溪夏亦寒溪頭箇箇白鷗閒風回綠卷平堤  
水林缺青分隔岸山若士振衣千仞表何人泛宅五  
湖間絕憐與子同清賞定向雲霄共往還

和華以愚韻兼題所畫春山高士圖

扁舟溪上數來過白髮殘春柰我何柳絮如烟迷曉  
浦杏花飛雪點春波林扉有客圖丘壑石室何人帶  
女蘿欲和華山高隱曲羈愁悽斷不成歌

寄王明卿

不見孝廉踰十年，高人風節自居然。  
數間茅屋無人補，一榻寒雲只獨眠。  
酒榼時須栗里菊，茶烟還煮惠山泉。  
衡門不出棲遲久，坐有孫登彈一絃。

送霞外師過磧沙寺因寄鄭博士毅長老

湖水東邊磧沙寺，繙經室裏看爭棋。  
食馴沙鳥巢當戶，坐愛汀雲影入帷。  
惠遠何修為律縛，康成終老只書痴。  
寄語山靈莫疑怪，松陰好護中興碑。

次韻錢思復見貽

文公傳法似傳燈，治病宜求三折肱。  
退食君休大槐國，安居我學小乘僧。  
業勤已有朋來樂，步濶能無祖武繩。  
欲挈一壺相慰藉，春船月色待君乘。

贈墨生吳善

吳生製墨變潘法，住近義興山郭中。  
洗玉巧當前澗水，采花還覓古時桐。  
照夜虹光燈隱壁，拂雲鸞尾谷生風。  
長年圭壁富潤屋，我善養生那有窮。

風雨

風雨蕭條歌慨慷，忽思往事已微茫。  
山人酒勸花間



言卷四  
四十六  
月秦女箏彈陌上桑燈影半窓千里夢泥塗一日九  
回腸此生傳舍無非寓謾認他鄉是故鄉

宿普度僧舍

悲涼華屋揔荒墟人事乖張已久如西部草池蛙鼓  
吹一襟桐露鶴皆除狂遊且盡餘生酒宿習猶存半  
軻書初日輕烟櫂歌去江潭柳影亦蕭疎

寄周履道

兼旬不見周徵士落月空梁夢見之久狎海鷗聊避  
俗虛言市虎竟成疑尊前節序梅將玉鏡裏形容鬢

已綵日暮烟濤隔城郭蕭條南渚一吟詩

曲彥遠寄茗果賦此道謝且求致梨栗木瓜

逸屋青山謝眺居木瓜梨栗種扶疎不妨暇日騎官  
馬自喜清時少簿書九月授衣霜欲落百年回首雁  
飛初猶憐踽踽空山客茗果封題遠慰予

寄徐李明

海虞山下徐公宅修竹長松左右栽陳榻待君時一  
下顧園有客莫驅回至今清夢依然在欲寄新詩草  
草裁自是漫郎嫌俗子也應魚石有蒼苔

三月廿二日雨懷荆溪舊遊寄原道

憶昔荆溪棹酒船綠波搖蕩女蘿烟春茶未放仙人  
掌雨蕨先舒稚子拳岩間石上尋遺迹作賦題詩多  
昔賢今日空齋獨對雨幽懷猶夢白雲邊

乙巳三月七日清明風雨憤憤因成長句

春風多雨少曾晴愁眼看花淚欲傾抱膝長吟酬短  
世傷心上已復清明亂離漂泊竟終老去任彼此難  
為情孤生弔影吾與我遠水滄浪堪濯纓

次韻贈林泉民張孟辰

三逕誰尋二仲蹤一丘之木紫溪翁思萼張翰有清  
識閉閣茂深多祖風午夢池塘春草綠輕陰窸戶落  
花紅應懷錫谷林泉勝山色依微在望中

故吾一首

縹緲青山日欲晡瀾漫秋水興何孤鶴歸城郭生新  
夢塵掩圖書尚故吾南畝藝苗傷碩鼠北窓臨澗聽  
啼鳥醉歸倘乞封侯地便復移家傍酒壚

寄顧仲瑛

江海秋風日夜涼虫鳴絡緯尚練裳民生惴惴瘡痍



甚旅泛依依道路長  
衰柳半歌湖水碧  
濁醪猶赴菊花黃  
知君習靜觀諸妄  
林下清齋理藥囊

病中懷先友華陽外史用韻一首

憶昔時雍四海寧  
華陽外史住南屏  
春愁黯黯懷仙  
卧幽鳥關關喚夢醒  
塞鴈歸時鶯出谷  
園花落盡柳  
縈青傷心南北數千里  
無復沙墩長短亭

雨中在林氏賦贈徐生

終朝風雨洗炎歊  
隱几無言思沈寥  
已絕鳴蟬咽衰  
柳空吟翡翠集  
蘭若嘉魚坊裏多名酒  
碧鳳橋邊欲

晚潮二子林徐有高致  
為陳筆墨遠相招

寄陳庶子

高行昔聞陳太丘  
雲行好在思遠遊  
丹砂擬訪葛洪  
井湖水堪乘范蠡  
蠡舟爐銀欲變頭  
先白田秫可釀行  
歸休且排憂憤澄  
神慮奏刀已覺無全牛

歸錫麓

未訪西岩墨沼泉  
東家兒女笑相牽  
莫話艱難長旅  
食敢忘蕭散送餘年  
穉稭雲黃秋雨後  
芙蓉霜落渚  
鷗邊歸來何異遼東鶴  
荒塚累累思惘然

送葉道士再用懸字韻二首

愁心黯對夕陽懸忽見高標喜欲顛似與人民千歲  
隔更詢耆舊一悽然青燈綠酒看成醉秘篋珍圖自  
滿船歸去還臨劔池月定應歌此酌山泉  
君到茅簷雨溜懸采芝期我碧山顛掀髯一咲非徒  
爾隔世重逢豈偶然沙渚屐聲歸泖客晚潮帆影下  
江船為予一話艱危際雙淚沾衣似迸泉

學書

幾叢枸杞護藩籬一逕莓苔卧鹿麋獨許陶泓為

友更呼毛穎伴幽棲野鷺家雞成品第來禽青李入  
書題臨池自嘆清狂甚直好還同鍛柳稽

贈范壻

范公文杏園西宅喧寂一塵渾異宜鼓琴深林調清  
越讀書稚子聲吾伊簾旌不動香如霧硯席生涼兩  
散絲欲飲寒泉錫麓洞暫違清賞一題詩

題鄧氏扇上

鄧家層軒留十日陸郎酒船來百回尊羹羹鱸膾亦已  
甚冰甌雪碗何為哉江雲飄飄委坐席岸柳垂垂落



酒杯飲酣戲寫齊紈扇山河微影月徘徊

二月二十日大風

南渚春風二月狂住船濯足 鳴榔烟邊去鳥暮山  
碧衣上飛花春雨香

遠懷不作悠悠語忍躡飛鳧返故鄉

寫画贈潘仁仲醫師

屋角東風多杏花小軒容膝度年華金梭躍水池魚  
戲彩鳳棲林澗竹斜疊疊清談霏玉屑蕭蕭白髮岸  
烏紗于今不二韓康價市上懸壺未足誇

贈沈生賣墨

沈學翁隱居吳市燒墨以自給所謂不汲汲於貴  
富不戚戚於貧賤者也烟細而膠清黑若點漆近  
世不易得矣因賦贈焉

桐烟墨法後松烟妙賞坡翁已久傳麋角膠清瑩玄  
玉龍文刀利淬寒泉山廡唯珍白鷺帖雲窓誰錄古  
苔篇夔爾治生吳市隱收煤 室數燈然

西

西

西



